

EVANS-WILLIAMS, LAURA (1883 - 1944), cantores

Enw: Laura Evans-williams
Dyddiad geni: 1883
Dyddiad marw: 1944
Priod: R.T. Williams
Rhiant: Ellen Evans
Rhiant: John Evans
Rhyw: Benyw
Galwedigaeth: cantores
Maes gweithgaredd: Cerddoriaeth; Perfformio
Awdur: Thomas Iorwerth Ellis

merch hynaf John ac Ellen Evans, Henllan, sir Ddinbych; ganwyd yn Bryn Meirion, Henllan, 7 Medi 1883. Bu'n ddisgybl yn ysgol Howell yn Ninbych, ac aeth wedyn i'r Royal Academy of Music yn Llundain. Dechreuodd ganu fel contralto, ac enillodd wobrau mewn amryw eisteddfodau; ond pan aeth i'r Academy fe'i hyfforddwyd gan Edward Iles, a daeth yn soprano 'delynegol'. Enillodd gryn fri fel datgeinydd mewn cyngherddau ac mewn oratorio; canai hefyd ganeuon operataidd yn bur effeithiol, a hoff iawn ganddi oedd canu alawon Cymreig, gan gynnwys alawon gwerin. Yn ystod rhyfel 1914-18 aeth ar daith ganu gyda'r gonorlalto enwog Clara Butt. Fe'i gwahoddwyd hi i ganu cân y cadeirio yn Eisteddfod Genedlaethol Birkenhead, 1917; a phan gyhoeddwyd bod y bardd buddugol ([Ellis H. Evans](#), Hedd Wyn (1887 - 1917) wedi ei ladd ar faes y gad, dewisodd ganu 'I Blas Gogerddan', a oedd yn hynod addas. Nid yn fuan yr anghofia'r rheini ohonom a oedd yno y digwyddiad hwnnw. Un mlynedd ar bymtheg yn ddiweddarach, yn Eisteddfod Genedlaethol Wrecsam, fe'i gwahoddwyd hi eto i ganu cân y cadeirio, a'r tro hwn bu raid iddi ail-ganu - yr oedd hynny'n beth anghyffredin iawn. Yr oedd hi'n un o'r datgeiniaid cyntaf o Gymry, onid y gyntaf, i ddarlledu o Savoy Hill. Aeth ar daith ganu i Daleithiau Unedig yr America yn 1926, ac yn 1940 dychwelodd o Lundain i Fae Colwyn i fyw. Bu'n dysgu canu yno nes iddi farw 5 Hydref 1944. Claddwyd ei chorff yn Henllan. Priododd, yn 1905, R. T. Williams, a ganwyd iddynt ferch a mab.

Awdur

Thomas Iorwerth Ellis, (1899 - 1970)

Ffynonellau

Liverpool Post and Mercury, 14 Awst 1933

North Wales Weekly News, 26 Hydref 1937

Denbigh Free Press, 14 Hydref 1944

gwybodaeth gan ei merch, Mrs. Castle, Sutton Coldfield

adnabyddiaeth bersonol

Darllen Pellach

Erthygl Wicipedia: [Laura Evans-Williams](#)

Dolenni Ychwanegol

Archifau LIGC: [T. J. Ellis and Mari Ellis Papers: I27: Correspondence and papers concerning Laura Evans-Williams \(1883-1944\)](#)

Wikidata: [Q20746780](#)

Dyddiad cyhoeddi: 1970

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

